

TE HEEHURAA API

I neia i te piha neneiraa no te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 3.

Mati, 1924.

Mat. 18.

*E tâhitohito tei te uaina; e hauti rahi tei te ava taero;
e ere i te taata paari tei vare i te reira. Maseli 20: 1.*

Te Ture Opaniraa Ava i Amerika

E rave rahi roa te mau taata tei mana'o e, e mea faufaa ore te opaniraa ava i te fenua Amerika ra. E mea atea roa râ te reira mana'o i te parau mau. Ua faatia-tamau-hia taua ture ra, e eita roa ia e faaorehia. Ua tuuhia te rima o taua feia rahi ra i te arote, e eita roa ratou e hi'o mai i muri. Ua huri atu ratou i te fare hoo ava i rapae au i taua fenua ra no te taime hopea roa. E ua ite ratou tei patoi atu i taua ture ra i te reira. Te parau atu nei ratou e, aita matou i hinaaro faahou i te fare hoo ava, tirara râ, te anihia nei te faatere hau ia faaapî ratou i te reira ture, ia nehenehe ia ratou ia hamani e ia hoo hoi i te uaina e te pia.

E toru taime to teie Saiete patoi opaniraa ava papairaa i te hoê taata haavâ o Wiriamu (William Gemmill) to'na i'oa, e 16 matahiti to'na nohoraa i nia i te parahiraa haavâ i te hoê oire rahi o Chicago. Ua titau ratou ia'na ia tau-turu oia ia ratou i te faaapîraa i te ture ava ia nehenehe ia

ratou ia hoo i te uaina e te pia. I muri a'era râ, ua ite ratou e, e mea huru ê to'na mana'o i te reira vahi; no te mea ua pahono atura oia i ta ratou titauraa, i te na ôraa atu e: Na roto i te vea i teie poipoi i farii ai au i te rata tei papaihia e ta outou Saiete i te titau-maite-raa ia'u ia faa-tupuhia te haamärûraa ô te ture opaniraa ava, ia tia te hoo-raa uaina e te pia.

Ua hi'o maite au i te mau i'oa o te mau taata maitatai tei papai i to ratou mau i'oa i raro a'e i ta outou parau ia faaetaetahia taua huru parau ra. E ua tupu to'u maere rahi i te reira. E e mea tia hoi ia pahono atu te hoê taata i ta outou mau papairaa, i te mea e, e mea haavare te rahiraa o ta outou mau parau, e te toea ra, e ere ia i te mea tia mau.

Te hinaaro nei au i te faaite atu i te hoê mau vahi hape e te tia ore i roto i ta outou papairaa. I te vahi matamua râ, ua na ô mai outou e, ua parauhia e, na te opaniraa ava e faaore i ta te mau feia apî inuraa i te ava, area râ, te haapapu mai nei te parau tuatapapa e, ua hau ta ratou inuraa ava i muri i te ture opaniraa ava, i to mua. Te haamau nei te mau taata hoo huna noa i te ava i teie peu iino, i roto i to te feia apî mau mana'o.

E ere roa teie i te parau mau mai te parau tuatapapa i haapaohia no te reira vahi. Ua haapapuhia mai râ e, ua iti to ratou inuraa i muri a'e i te opani-raa-hia o te ava, i to mua atu, i te vai opani-ore-raa ra.

Te vai nei hoi te mau numera tei faatia i ta'u mau parau i te hoê taata haavâ no te feia apî. Ua mau oia i te reira toroa'i na matahiti e rave rahi.

Ua faatia atoa mai outou e, ua parauhia e, na te ture opaniraa ava e faaiti i te moni aufau na te hau, oia, te toru o te tufaa i roto i te maha te faaitihia, tirara râ, ua faarahihia ia na taime e piti i te opaniraa ava. Te titau faahou nei outou i te haavare i te huiraatira, i te mea e, ua ite

papu outou i te tumu i rahi ai te moni aufau na te hau ra, oia hoi, o teie tama'i ia te tumu e no reira i rahi ai te hoo no te mau mea atoa, e ere roa ia te ture opaniraa ava.

Ua parau atoa mai outou e, i parauhia e, na te opaniraa ava e faaiti i to te mau fare auri e to te mau fare veve e to te mau fare no te feia maamaa, area râ, i na matahiti e piti i muri a'e i te opaniraa ava i i roa ai taua mau fare ra. E haavare mau hoi teie. Ua ere te hoê o te tufaa i roto i te pae o te mau fare auri i te feia hara, i te fenua ra i Amerika i muri a'e i te opaniraa ava, e te mau fare auri e mau auri to roto ra, ua iti roa'e ia i to mua a'e i te opaniraa i te ava. Ua haaputuputu mai au i te rahiraa no to te mau auri i na matahiti e hitu e na teie mau numera i haapapu mai e, ua iti iho â te mau auri to muri a'e i te opaniraa ava i to mua'e.

Ua faaitihia te afa tia no te hoê fare ma'i rahi i te oire i Chicago, mai te matahiti hou te opaniraa ava e tae noa'tu i te matahiti i mua iho i te reira.

I roto i te matahiti hou te ava i opanihia'i, i pohe roa ai 169 taata i roto i taua fare ma'i ra i te ava. I roto râ i te matahiti i muri iho i te opaniraa ava i pohe roa'i hoê noa iho taata i te reira tumu. Na te tuatapapa parau o te mau fare no te feia i maamaahia i te tufaa fenua i Ilinoi, e i te tahi atu â mau fenua, i haapapu mai e, ua iti atoa to teie mau fare i muri i te opaniraa ava i to mua. Te tumu rahi no te feia i maamaahia ra o te ava mau ia.

Te parau atoa mai nei hoi outou e, i parauhia ra e, na te opaniraa ava e faaiti i te haavâraa no te feia rave ha ra, tirara râ e mea maere ia hi'opoa i te rahiraa o teie mau huru haavâraa, ua rahi mau a'e to muri i te opaniraa ava i to mua, e te tupu noa nei hoi to te mau taata haapao ore e te faatura ore i te mau ture no te reira i te rahiraa. Inaha, teie faahou â te mau parau haavare ana'e e te tia ore hoi. Ua iti a'e te ofatiraa ture i roto i te mau oire rarahi no te

hau i Amerika nei i muri i te opaniraa ava i to mua. I te tahi mau oire, ua faaorehia te afa tia e tiahapa o te mau ofatiraa ture. Tei mua ia'u i teie nei te tuatapaparaa parau no te mau oire rarahi o te hau nei, i roaa apî mai ia'u no te 1 no Tenuare nei.

I roto i te matahiti 1919, oia te matahiti hou te ava i opanihia'i, ua tapeahia mai e 94,000 taata rave hara i te auri, i roto i te oire ra i Philadelphia. I te matahiti 1920, oia hoi, te matahiti i muri iho i te opaniraa ava, ua tapeahia e 73,015 taata rave hara i te auri i taua iho â oire ra. I to'u parauraa no nia iho i te ofatiraa ture ra, o te mau hara rarahi ia mai te taparahi taata, te eiâ, te haruraa i te tao'a e te tahi atu â mau hara mai te reira te te huru. Te faatiaraa o te mau hara rarahi ra, o te mea faufaa rahi ia.

Mai te mea e, te hinaaro nei outou i te mau numera, e mauruuru ia vau i te faaite ia outou i te reira no na oire rarahi e 25 tiahapa no Amerika nei. Teie hoi te tahi tufaa rii no taua mau numera ra. E nehenehe ia'u e faaite atu ia outou i te rahiraa o te mau taata i tapeahia i te auri, no te taparahi taata e te eiâ e no te haruraa tao'a, e no te tahi atu â mau hara i ravehia i roto i taua mau oire ra.

I te matahiti 1917 i te oire ra i Chicago, ua tapeahia e 129,270 taata ofati ture i te auri. I te matahiti râ 1920 ua tapeahia e 87,197 taata ofati ture i te auri i roto i taua oire ra. I te matahiti 1918 i te oire ra i Cincinnati, ua tapeahia e 22,883 taata ofati ture i te auri. I te matahiti râ 1920 ua tapeahia 15,944 taata rave hara no taua oire ra. I te matahiti 1918 i te oire ra i Buffalo, ua tapeahia e 35,902 taata ofati ture i te auri. I te matahiti 1920 ua tapeahia e 24,436 taata hara no taua oire ra. I te matahiti 1918 i te oire ra i Baltimore, ua tapeahia e 62,076 taata ofati ture i te auri. I te matahiti 1920 ua tapeahia 41,998 taata ofati ture no taua oire ra. I te oire râ i New Orleanes ua tapeahia 23,239 taata ofati ture i te auri. I te matahiti 1920 ua tapeahia e 15,079 taata ofati ture no taua oire ra.

Teie te hoê parau tuatapapa no te hoê mau oire rii no roto mai i na oire e rave rahi ta'u i haaputuputu mai.

Te rahiraa o te mau taata i tapeahia i te auri ra, a vai ai te ava ra, o te mau taata ia tei taero i te ava. Ua tamata maite outou i te haapapu mai e, ua rahi a'e te mau taata taerehia i te ava i teie nei mahana i Amerika nei, i to te matamua hou i opanihia'i te ava. E ite mau hoi outou e, e ere roa ia i te parau mau. Na roto mai i ta'u hi'opoa-maite-raa e ta'u raveraa hoi i te numera no teie mau oire e rave rahi, tei ite papu e, ua rahi a'e to te mau taata taero i te ava tei tapeahia i te auri i te matahiti hou te opaniraa ava i to muri. E mea huru iti hoi to te feia taero ava tapea-raa-hia i te auri i roto i te mau oire nainai i to te mau oire rarahi i te fenua e hope roa'e teie nei hau. Ua haaputuputu hoi au i te parau tuatapapa no teie nei mau oire hopea e rave rahi. E mea tia hoi ia parau atu e, ua iti to te feia taerohia i te ava tapea-raa-hia i roto i te hau Amerika taatoa, e 700,000 taata i te matahiti hoê to muri i te opaniraa ava i to mua.

Ua parau mai hoi outou e, i parauhia ra e, na te opaniraa ava e faatupu i to te taata faatura i te ture, area râ, aita te taata i haapao ore i te ture mai i teie nei te huru i te mau tau i mutaa ihora. Aita râ e parau mau i roto i teie parau hopea nei. Aita roa i itehia to te hau nei faaturaraa e te haapaoraa hoi i te ture i te mau tau i mutaa ihora, mai ta ratou e haapao nei i teie nei mau mahana. E rave rahi hoi te mau taata ofati ture i te fenua i teie nei, tera râ, te na tufaa e maha no roto mai i te pae o taua mau ofatiraa ture ra, no roto mau mai ia i te mau fare hoo ava te hoo huna noa nei i te ava ma te ofatiraa i te ture. Ahiri outou i haapuai i ta outou titauraa ia faatiahia te ture mai ta outou i titau i te haamou i te reira, e riro ia outou i te faaiti i te mau ofatiraa ture i te fenua nei.

Ua hi'o hoi au i ta outou parau, i te na ôraa'tu e: "E

pia e te uaina eiaha râ te fare hoo ava."

Inaha, te vai nei hoi te tahi maitai rii i noaa ia outou no te opaniraa ava, no te mea, te hinaaro nei outou i te faaore i te mau fare hoo ava. Aita hoi au i faaroo i ta outou Saiete i te parauraa i teie parau hopea i te mau tau i mairi a'enei. E no reira, te pee rii nei outou i te mana'o e te hinaaro maramarama no to te ao nei.

O te parau teie i mua nei a te hoê ite rahi e te toroa rahi hoi, e aita e nehenehe ia patoi i taua parau na'na ra, no te mea e, ua imi maite oia i te parau mau, a faaite papu atu ai i te feia hamani ava. E eaha mau te tumu taua Saiete Patoi Opaniraa ava ra i titau ai ia faaorehia, e aore râ ia haaparuparuhia taua ture ra, a faatiahia'i te hamaniraa e te hooraa i te uaina e te pia. Tera ia: Te imi nei ratou i ta ratou iho ravea e faufaahia'i ratou i te pae moni; e aita ratou e peapea ia ino-noa-hia'tu te hau, ia maamaahia te mau taata, ia tapeahia ratou i te auri, e ia pohe noa'tu no te inuraa i te mau ava; ua mauruuru ia ratou i te mea e, ua riro mai ia ratou te moni e te faufaa a te mau taata tei hoo mai i ta ratou ava. No reira eiaha tatou e vare i ta ratou mau parau.

E ere ia to tatou maitai tei imihia e ratou, to ratou iho râ. Tei ia tatou te imi i to tatou iho maitai; e ua ite papu hoi tatou e, ia mau'ahia ta tatou moni e te faufaa, e ia haaparuparuhia, e ia ma'ihia hoi to tatou mau tino i te inuraa ava, e ere mau ia i te maitai no tatou. O to tatou ia maitai rahi, ia tapea maite i ta tatou faufaa, e ia faatupu e ia tapea noa i te tino etaeta maitai e te ma'i ore. Te na ô maira Solomona "O te taero ava hoi e te oehamu tiaâ ra, e veve ia." Maseli 23: 21. E te na ô maira te ture i to Iseraela ra: "Eiaha ei uaina e te ava taero e inuhia e oe e to tamarii atoa; ia haere outou i roto i te tiahapa amuiraa, a pohe hoi outou." Levitiko 10: 9. Tai'o atoa ia Maseli 23: 29-35; e ia Isaia 28; 1.

—*Faaauhia e Elavana*

Te Hoê Parau Ite ei Faaitoitōraa

(Tuatiraa teie nei parau.)

58. Tei roto i te ekalesia tahito ra te mau Aposetolo, te mau Peropheta, te Tahu'a Rahi, te Hitu Ahuru, te mau Peresibutero, te mau Patereareha, te mau Episekopo, te mau Tahu'a, te mau Haapii, e te mau Diakono atoa hoi.

Ua faatiahia te ekalesia a te Mesia e au i te hinaaro o te Atua. Ua tuuhia teie nei mau toroa i roto ra, e ua horoahia mai te mana no ô mai ia Iehova i te feia toroa ra, e tia ia ratou ia haamau i raro nei i roto i teie nei ao, e e haamauhia ia i nia i te ra'i atoa ra.

59. Tei ia ratou hoi te mau mea horoa a te Varua Maitai ra o tei faariro i to ratou paruparu ra ei puai, e ei itoitō rahi i roto i te mau ohipa o te evanelia ra. Na te Varua Maitai hoi to ratou ite ore i faarirohia'i ei paari rahi ra. Ua faaite-noa-hia maira te mau tapao. Mar. 16: 17-18. I te feia tei farii i ta ratou ma te aan tatarahapa e te faaroo feaa ore atoa hoi.

60. No teie nei mau toroa ra, no te mau horoaraa o te Varua Maitai ra, e no te mau tapao hoi i te pee-noa-raa i te feia faaroo ra, ua riro ia te ekalesia a te Mesia ra ei ekalesia huru ê roa i te mau ekalesia, i te mau basileia, e i te mau haapaoraa'toa i nia i te fenua nei i taua anotau ra. A hi'o na tatou i te tahi pae o taua mau mea huru ê ra.

61. "Te mau Aposetolo ra":—Ua tun atura te Atua i teie nei toroa Aposetolo i roto i te ekalesia ra, o mua ia. Korinetia 1, 12: 28. E Aposetolo ia Iesu Mesia ra. Hebera 3: 1-2. Ua maiti ihora hoi te Mesia i na taata tino ahuru ma piti ra, e ua horoa'tura i te mana ia ratou ra ia riro ratou ei aposetolo. Luka 6: 13; Mataio 10: 1-4. E aposetolo atoa hoi taua taata itoitō ra o Paulo. Galatia 1: 1.

62. Ua itea-papu-roa-hia e, tei roto i te ekalesia tahito ra te mau aposetolo, e eaha e ore ai i roto i te ekalesia i te

tau hopea nei. Na te Atua ratou i tuu i roto i te ekalesia ra: E mea tia anei i te taata ia faaore e ia tapu ê atu i taua toroa ra, mai tei ravehia e te rahiraa o te mau haapao-raa i teie nei ao, o tei parau noa maira e, o ratou te ekalesia mau a te Mesia ra? E ore roa'tu ia e mana'ohia e, e mea tia taua huru ohipa ra i mua i te aro o te Atua ra, no te mea aita i oti te ohipa a te aposetolo i roto i teie nei ao.

63. Te faaite mai nei Paulo i te ohipa a te aposetolo mai tei roto i te Ephesia pene 4; e te irava 11-15; o tei na ô mai e: "E ua haapao oia i te tahi ei aposetolo; e te tahi pae ei peropheta; e te tahi pae ei haapii evanelia; e te tahi pae ei tia i e ei orometua; ei faaau i te feia mo'a i te ohipa ra e orometua, ia tupu i te maitai te tino o te Mesia ra: ia riro tatou atoa nei ei taata paari, i te faaroo hoê e te ite hoê i te Tamaiti a te Atua, ia taea te faito ra i te î o te Mesia i te rahi."

64. E teie nei, ua riro anei te taata'toa ei feia paari ra? Aita. E feia paari ore te tahi pae. E faaroo hoê e e ite hoê anei to te taata'toa i te Tamaiti a te Atua i teie nei? Aore roa'tu. Ua hanere te faaroo huru ê i nia i te fenua nei; ua rau te ekalesia tei faahapa te tahi i te tahi; ua milioni te taata tei ore i ite i te i'oa o te Mesia ra.

65. Ua taea anei tatou atoa i te faito ra i te î o te Mesia i te rahi? Eiaha roa ia. Aita tatou i î i te mana, te ite, te paari, te aroha, te faaoromai, e te parau-tia mai te î o Iesu Mesia i taua mau mea ra. No reira ua taa maitai roa e, aita i oti te ohipa a te aposetolo ra. Ua haamau atura te Atua i taua toroa ra i roto i te ekalesia ra; eiaha tatou e tapu ê atu, e e faarue ê atu i rapae au ra. Aita e tia i te taata ia faahuru ê i te basileia a te Atua ra.

66. "Te mau Peropheta ra":—Ia ore te peropheta i roto i te hoê ekalesia ra, e tapao mau ia te reira e aore roa e mana o te Atua i rotopu i te mau taata no taua ekalesia ra. Ia tai'o-maite-hia te mau parau i roto i te faufaa tahito e i roto hoi i te faufaa apî o te bibilia nei, e itea-papu-roa-hia e, ei te tau i ninii-hua-hia mai ai te Varua Maitai i nia iho i te taata nei, ei taua tau mau ra, ua rahi roa ia te mau peropheta i rotopu ia ratou ra.

E tuatihia teie nei parau

Te Mau Parau Apî Radio

Eita te Peresideni rahi no Amerika e faaherehere i te feia rave hara i roto i te apooraa i parihia i te peu tia ore i roo mai i teie avae i mairi a'enei, i roto i te mau faaauraa ohipa heruraa mori arahu.

Ua ore ta te vetahi mau hau tiaturiraa i nia i te maitai e te puai a to ratou mau pahi tama'i rarahi i teie nei, no te papu te ohipa topita a te pahi ta pupuhi maue na te reva, i tamatahia iho nei i nia i te vetahi mau pahi tama'i tahito o tei tomo oioi noa.

Ua fa'i roa te Pope rahi no Beletita e tei te mau hau amui te faaitoito no te titaauraa i te tarahu a Purutia, no te mea te imi mau ra te Purutia i te ravea haaveve fenua ia ore ia nehenehe te titaauraa; mai te peu e eita tatou e faa-oioi, o Purutia ia tei upootia.

Faaiteraa no Ruru

Ia hinaaro outou i te tape'a, e te uati, noa'tu te huru;
Ia hinaaro outou ia hamanihia to outou mau tape'a, te pine, te tautau;
Ia hinaaro outou ia tataihia to outou mau tape'a;
Ia hinaaro outou i te hoo mai i ta outou mau tiko, te patoetoe, te mau tape'a tahito, te hei pupu, etc.;
Ia hinaaro outou ia papaihia to outou mau i'oa i nia e aore râ i roto i to outou mau tape'a, te pine, e te tautau;
Ia hinaaro outou ia faaapihia to outou mau tape'a tahito;

Haere i o Ruru

*to'na iho â fare parai rea ute
te aroa Petite Pologne*

PAPEETE

Ua Neneihia Anei To Oe Hoho'a

Aita'tu e tao'a nehenehe e te faufaa hoi i te hoho'a—no oe iho, no te tane e te vahine, no te aiû apî, no te metua ruau, e aore râ no te utuafare.

E tei te fare neneiraa hoho'a a Viriamu te mau ravea apî e papu roa'i e e nehenehe roa'i te mau huru hoho'a—i te moni māmā hoi.

Eiaha e tiai noa—haere râ i teie nei, no te mau hoho'a ta oe i hinaaro.

William Crake

I pihaiho i te Fare Moni Initta Tatna
PAPEETE

Tao'a Apî Farani

Mea rahi te taihaa apî no
nia mai i te pahi rahi Farani.

Pereoo taataahi tane
e te vahine—te au'a
e te mereti—e ua rau
te huru te ahu Fara-
ni ana'e.

Ia mataitai ana'e ua rave
iho â.

Fare Toa No Aiu.

FARE TAMAARAA TINITO

I Tatahi lei fatata i te fare toa no Pute

Teie te Hooraa

Te mau roi auri, roi raau, roi veo;
Te mau afata ume, afata roa, afata
raau noanoa, afata ma'i (pohe);
Te mau huru UPAUPA, Mando-
line, Guitare, Ukulele, e to'na
mau niuniu atoa;

Te mau huru peni vaa, Fare, Pere-
oo, Afata Ume, e te tahi atu â.
Tei reira'toa hoi te hamani raa e te
tatairaa i te mau huru haneti atoa.
Tei reira'toa te mau hahu raa, e te
âe raa raau.

Tei reira'toa te tarahu raa Pereoo
uira: taniuniu noa io Bambridge,
Papeete, ia tae atu te Auto, no-
a'tu te hora i te pô e te ao.

Bambridge, Dexter & Co.

oia hoi io TIHOTI MAEHAA

Te vai ra i mua i te to'a a Ruru te parau apî RADIO
i iritihia na roto i te re'o Tahiti.

I teie nei na avae i mairi a'enei ua taparahi-pohe-roa-
hia na orometua Porosetani e tootoru e te pupu eiâ Tinito i
te fenua Tinito. No te haapaoraa Porosetani i parauhia
Lutheran teie nei na orometua, o Barnard Hoff e ta'na
vahine e o Julia Kilen te i'oa. E mea ino roa te raveraa a
teie pupu taata i te fenua Tinito, e te hamani-ino-noa-hia ra
te mau papaa i reira. Ua tae atura te parau a te Hau Fâ-
rani i te Hau Tinito e, ia paruruhia to'na ra mau taata e
tia'i; e tei reira atoa na pahi manuâ rarahi a te Hau Ame-
rika no te parururaa hoi i to'na ra mau taata.

I roto i te avae Ditema i mairi a'enei, ua tae faahou
atura te mau taata papaa tei imi i te mau mea tahito i te
fenua ra i Aiphiti, e vavahi ihora ratou i te menema no te

Pharao tahito ra o Tutankhamon. E mea rahi roa te mau peu nehenehe i roto i taua menema ra, e mau mea faufaa ana'e, e e rave rahi atoa te mau mea auro i roto. Ua mana'ohia e, e tae te faufaa o taua mau mea i ravehia ra i te moni e pae ahuru milioni dara, moni Amerika. Ua tai'ohia e hoê tausani metera auro ana'e. E toru tausani matahiti i mairi a'enei te poheraa o taua arii Aiphiti ra.

Te tauturu rii nei te Hau Amerika i te Hau Mexico i teie nei i te haavî i te mau orurehau no taua fenua ra, e ia faaore i te tama'i, e faatupu i te hau. Te hoohia'tura te mau mauhaa tama'i i te Hau Mexico, mai te pupuhi, te ofai pupuhi e te pahi reva. Ua ani atoa maira te mau taata orurehau e hoo i taua mau huru mauhaa tama'i, aita râ te Hau Amerika e faatia. I teie nei hoi e haavî-mau-hia'i taua mau orurehau ra, e eita paha e maoro, ua hau faahou taua fenua ra.

Ua Faaroo Tatou

I te parau apî o te tauî o te moni Marite e te moni Beritane—e no reira ua pee te moni o te mau taihaa i nia.

Mea Mama ta Pute

Aita râ te moni o te pua i te faretoa a Pute i haerei nia, no te mea no Tahiti iho nei te hamani-raa-hia.

Hoê Noa Iho Afa i te Pâ

A. Leboucher

PAPEETE

Tamuta Hamani Pahi e te Fare

Mai te mea e, te opua nei oe i te hoo i te tahi poti tere roa a'e i te tahi atu â mau poti, haere io PERO, oia hoi, F. R. & I. E. WALKER, na ratou e hamani i taua poti ra ma te maitai e te hoo māmā.

Haere na a mataitai i ta ratou mau hoho'a poti, haere na a mataitai i ta ratou aua hamaniraa pahi.

Farerei na ia PERO ma, no te hamaniraa i to oe fare, eita oe e tata-rahapa.

Afai na ta oe mau iri raau i hinaaro i te êê e te hahu ia PERO ma, na ratou e rave.

F. R. & I. E. WALKER

PAPEETE

E tamata faahou te mau taata haapii fetia e te ite hohonu o te ao nei i te paraparau atu i to te hoê fetia ao ra, Mars to'na i'oa. O te ao fatata ia i to tatou ao nei. E faatiahia te hoê fare hi'oraa i nia i te tupuai o te mou'a ra o Jungfrau, i te fenua ra i Switzerland, i Europa. E 13,668 avae te teitei o taua mou'a ra. Ei roto i te avae Atete i mua nei e tamatahia'i taua paraparauraa ra, no te mea i taua taime ra e au roa'i to Mars tiaraa i to te ao nei. Te hamanihia nei te mau hi'o rarahi api, e te mau mauhaa api e manuia'i taua tamataraa ra.

E peapea rahi hoi tei tupu i rotopu i te mau orometua Porosetani i te fenua Amerika i roto i teie nei na avae i mairi a'enei. Te mârô noa ra ratou no nia i te fanauraa o te Mesia e to'na tia-faahou-raa mai te pohe maira, e te tahi atu â mau parau. Na ô maira te tahi pae, e mau parau faaau noa taua mau parau ra, e ere ia Iesu i te tamaiti mau na te Atua, mai tei faaitehia e te Bibilia, e aore oia i tia faahou mai i muri i to'na poheraa; aore atoa Iesu i rave mau i te mau semeio i faaitehia maira; e aita hoi e diabololo. Na ô maira râ te tahi pae, oia mau hoi ta te Bibilia e faaite nei, e tamaiti fanau-tahi mau o Iesu na te Atua, e ua rave mau oia i taua mau ohipa maere e hope roa'e ra, e te patoi-noa-hia nei ta'na ohipa e te diabololo. Te huru ia, te tamata nei te tahi mau orometua Porosetani i te patoi i te parau a te Atua, e ia faaore i te faufaa no te Bibilia, e te tupu nei te amahamaha i rotopu ia ratou. I te avae Tenuare i mairi a'enei, ua papaihia te hoê parau faaau, i te na ôraa mai e, e haapii ratou i te mau huru parau ta ratou i hinaaro, noa atu te mana'o e te parau a te tahi mau orometua tahito, e papai ihora e 150 orometua Porosetani i to ratou mau i'oa i nia i taua parau faaau ra.

O. B. Peterson, Imprimeur,
Rue Brea et de la rue Dumont d'Urville, Orovini, Papeete